

摛藻堂四庫全書薈要

子部

欽定四庫全書會要

子部

孔叢子卷中

下

詳校官員外郎臣潘紹觀



欽定四庫全書叢要卷一萬二百二十八

子部

孔叢子卷中

漢 孔鮒 撰

公孫龍第十二

公孫龍者平原君之客也好刑名以白馬為非白馬或謂子高曰子高孔穿之字孔  
箕之子伋之玄孫此人小辨而毀大道子盍往正諸子高曰大道之悖天下之校枉也吾何病焉或曰雖然子為天下故往也子高適趙與龍會平原君家

謂之曰僕居魯遂聞下風而高先生之行也願受業之日久矣然所不取於先生者獨不取先生以白馬為非白馬爾誠去非白馬之學則穿請為弟子公孫龍曰先生之言悖也龍之學正以白馬非白馬者也今使龍去之則龍無以教矣今龍為無以教而乃學於龍不亦悖乎且夫學於龍者以智與學不逮也今教龍去白馬非白馬是先教也而後師之不可也先生之所教龍者似齊王之間尹文也齊王曰寡人甚好士而齊國無士尹

文曰今有人於此事君則忠事親則孝交友則信處鄉  
則順有此四行者可謂士乎王曰善是真吾所謂士者  
也尹文曰王得此人肯以為臣乎王曰所願不可得也  
尹文曰使此人於廣庭大衆之中見侮而不敢鬪王將  
以為臣乎王曰夫士也見侮而不鬪是辱則寡人不以  
為臣矣尹文曰雖見侮而不鬪是未失所以為士也然  
而王不以為臣則鄉所謂士者乃非士乎夫王之令殺  
人者死傷人者刑民有畏王令故見侮終不敢鬪是全

王之法也而王不以為臣是罰之也且王以不敢鬪為辱必以敢鬪為榮是王之所賞吏之所罰也上之所是法之所非也賞罰是非相與曲謬雖十黃帝固所不能治也齊王無以應且白馬非白馬者乃子先君仲尼之所取也龍聞楚王張繁弱之弓載忘歸之矢以射蛟兕於雲夢之囿反而喪其弓左右請求之王曰止也楚人遺弓楚人得之又何求乎仲尼聞之曰楚王仁義而未遂亦曰人得之而已矣何必楚乎若是者仲尼異楚人

於所謂人也夫是仲尼之異楚人於所謂人而非龍之  
異白馬於謂馬悖也先生好儒術而非仲尼之所取也  
欲學而使龍去所以教雖百龍之智固不能當前也子  
高莫之應退而告人曰言非而博巧而不理此固無所  
不答也異日平原君會衆賓而延子高平原君曰先生  
聖人之後也不遠千里來顧臨之欲去夫公孫子白馬  
之學今是非未分而先生巍然欲高逝可乎子高曰理  
之至精者則自明之豈任穿之退哉平原君曰至精之

說可得聞乎答曰其說皆取之經傳不敢以意春秋記六鶴退飛覩之則六察之則鶴鶴猶馬也六猶白也覩之得見其白察之則知其馬色以名別內由外顯謂之白馬名實當矣若以絲麻加之女工為緇素青黃色名雖殊其質則一是以詩有素絲不曰絲素禮有緇布不曰布緇櫬牛亥武此類甚衆先舉其色後名其質萬物之所同聖賢之所常也君子之謂貴當物理不貴繁辭若尹文之折齊王之所言與其法錯故也穿之所說於

公孫子高其智悅其行也去白馬之說智行固存是則  
穿未失其所師者也稱此云云沒其理矣是楚王之言  
楚人亡弓楚人得之先君夫子探其本意欲以示廣其  
實狹之故曰不如亦曰人得之而已也是則異楚王之  
所謂楚非異楚王之所謂人也以此為喻乃相擊切矣  
凡言人者總謂人也亦猶言馬者總謂馬也楚自國也  
白白色也欲廣其人宜在去楚欲正名色不宜去白忱  
察此理則公孫之辨破矣平原君曰先生言於理善矣

因顧謂衆賓曰公孫子能答此乎燕客史由對曰辭則有焉理則否矣公孫龍又與子高記論於平原君所辨理至於臧三耳公孫龍言臧之三耳甚辨析子高弗應俄而辭出明日復見平原君曰疇昔公孫之言信辨也先生實以為何如荅曰然幾能臧三耳矣雖然實難僕顧得又問於君今為臧三耳甚難而實非也謂臧兩耳甚易而實是也不知君將從易而是者乎亦從難而非者乎平原君弗能應明日謂公孫龍曰公無復與孔

子高辨事也其人理勝於辭公辭勝於理辭勝於理終必受訛 李寅言曹良於平原君欲仕之平原君以問子高子高曰不識也平原君曰良嘗得見於先生矣故敢問子高曰世人多自稱上用我則國無患夫用智莫若觀其身其身且猶不免於患國用之亦烏得無患乎平原君曰良之有患時不明也居家理治可移於官良能殖貨故欲仕之子高曰未可知也今有人於此身修計明而貧者志不存也身不修會計闇而富者非盜無

所得之也

儒服第十三

子高衣長裾振褒袖方展簾翫翫扇見平原君君曰吾  
也子亦儒服乎子高曰此布衣之服非儒服也儒服非一  
也平原君曰請吾子言之荅曰夫儒者居位行道則有  
袞冕之服統御師旅則有介胄之服從容徒步則有若  
穿之服故曰非一也平原君曰儒之為名何取爾子高  
曰取包衆美兼六藝動靜不失中道子高遊趙平原

君客有鄒文季節者與子高相善及將還魯諸故人訣  
既畢文節送行三宿臨別文節流涕交頤子高徒抗手  
而已分背就路其徒問曰先生與彼二子善彼有戀戀  
之心未知後會何期悽愴流涕而先生厲聲高揖此無  
乃非親親之謂乎子高曰始焉謂此二子丈夫爾乃今  
知其婦人也人生則有四方之志豈鹿豕也哉而常聚  
乎其徒曰若此二子之泣非耶荅曰斯二子良人也有  
不忍之心若於取斷必不足矣其徒曰凡泣者一無取

乎子高曰有二焉大姦之人以泣自信婦人懦夫以泣  
著愛 平原君與子高飲強子高酒曰昔有遺誨堯舜  
千鍾孔子百觚子路噬嗑尚飲十榼古之聖賢無不能  
飲也吾子何辭焉子高曰以穿所聞賢聖以道德兼人  
未聞以飲食也平原君曰即如先生所言則此言何生  
子高曰生於嗜酒者蓋其勸厲獎戲之辭非實然也平  
原君欣然曰吾不戲子無所聞此雅言也 平原君問  
子高曰吾聞子之先君親見衛夫人南子又云南遊遇

乎阿谷而交辭於漂女信有之乎荅曰士之相信聞流言而不信者何哉以其所已行之事占之也昔先君在衛衛君問軍旅焉拒而不告問不已攝駕而去

攝取衛也

君請見猶不能終何夫人之能覩乎古者大饗夫人與焉於時禮儀雖廢猶有行之者意衛君夫人饗夫子則夫子亦弗獲已矣若夫阿谷之言起於近世殆是假其類以行其心者之為也子高適魏會秦兵將至信陵君懼造子高之館而問祈勝之禮焉子高曰命勇謀之

將以禦敵先使之迎於敵所從來之方為壇祈克于五  
帝衣服隨其方色執事人數從其方之數牲則用其方  
之牲祝史告於社稷宗廟邦域之內名山大川君親素  
服誓衆于太廟曰某人不道侵犯大國二三子尚皆同  
心比力死守將帥稽首再拜受命既誓將帥勒士卒陳  
于廟之右君立太廟之庭祝史立于社百官各警其事  
御于君以待命乃大鼓于廟門詔將帥命卒習射三發  
擊刺三行告廟用兵于敵也五兵備効乃鼓而出以即

敵此諸侯應敵之禮也信陵君曰敬受教信陵君問子  
高曰古者軍旅賞人必於祖戮人必於社其義何也荅  
曰賞功於祖告分之均示不敢專也戮罪於社告中於  
土示聽之當也 陳廷魏人性多穢訾每得酒食必先撥  
捐之然後乃食子高告之曰子無然也似有態者昔君  
子之於酒食有率嘗之義無捐放之道假其可食其上  
下如擇假令不潔其下滋甚陳廷曰吾知其無益意欲  
如此子高曰意不可恣也夫木之性以隱括自直可以

人而不如木乎子不見夫雞耶聚穀如陵跪而啄之若縱子之意則與雞豈有異乎陳廷跪曰吾今而後知過矣請終改之子高任司馬又為將於齊與燕戰而敗齊君曰以子賢明故信子也荅曰君知穿孰若周公齊君曰周公聖人而子賢者弗如也子高曰然臣固弗如周公也以臣之知又孰若周公之知其弟齊君曰兄弟審於他人子高曰君之言是也夫以周公之聖兄弟相知之審而近失於管蔡明人難知也臣與乂相見觀其

材志察其所履齊國之士弗能過也書曰知人則哲惟  
帝難之穿何慚焉且曹子為魯三與齊戰三敗失地然  
後以勇敢之節奮三尺之劒要桓公管仲於盟壇卒收  
其所喪夫君子之敗如日月之蝕人各有能又庸可棄  
乎今燕以詐破又是又不能於詐也臣之稱又稱其武  
勇才藝不稱其詐也又雖敗臣固不失其所稱焉齊君  
屈辭而不黜司馬又

對魏王第十四

魏王問人主所以為患

魏安釐王

子高對曰建大臣而不與

謀嬖倖者言用則知士以疎自疑

自疑上之疎已也

嬖臣以遇

傲幸者內則射合主心外則挺主之非此最人主之大

患也子高謂魏王曰臣入魏國見君之二計臣焉張

叔謀有餘范威智不逮然其功一也王曰叔也有餘威

也不逮何同乎答曰駕驥同轅伯樂為之咨嗟玉石相

揉和氏為之嘆息故賢愚共貫則能士匿謀真偽相錯

則正士結舌叔雖有餘猶威不逮也魏王問何如可

謂大臣子高答曰大臣則必取衆人之選能犯顏諫諍  
公正無私者計陳事成主裁其賞事敗臣執其咎主任  
之而無疑臣當之而弗避君總其美臣行其義然則君  
不猜於臣臣不隱於君故動無過計舉無敗事是以臣  
主並各有得也 信陵君問曰古之善為國至於無訟  
其道何由荅曰由乎政善也上下勤德而無私德無不  
化俗無不移衆之所譽政之所是也衆之所毀政之所  
非也毀譽是非與政相應所以無訟也 齊王行車裂

之刑羣臣諍之弗聽子高見於齊王曰聞君行車裂之刑無道之刑也而君行之臣竊以為下吏之過也王曰寡人以民多犯法為法之輕也子高曰然此誠君之盛意也夫人含五常之性有喜怒哀樂喜怒哀樂無過其節節過則毀於義民多犯法以法重無所措手足也今天下悠悠士無定處有德則住無德則去欲規霸王之業與衆大國為難而行酷刑以懼遠近國內之民將叛四方之士不至此乃亡國之道君之下吏不具以聞徒

恐逆主意以為憂不慮不諫之危亡其所矜者小所喪者大故曰下吏之過也臣觀之又非徒不諫而已也心知此事之為不可將有非議在後則因曰君忿意實然我諫諍必有龍逢比干之禍是為虛自居於忠正之地而閭推君主使同於桀紂也且夫為人臣見主非而不諫以陷主於危亡罪之大者也人主疾臣之弼已而惡之資臣以箕子比干之忠惑之大者也齊王曰謹聞命遂除車裂之法焉子高見齊王齊王問誰可臨淄宰

稱管穆焉王曰穆容貌陋民不敬荅曰夫見敬在德且  
臣所稱稱其材也君王聞晏子趙文子乎晏子長不過  
三尺面貌惡齊國上下莫不宗焉趙文子其身如不勝  
衣其言如不出口非但體陋辭氣又呐呐然其相晉國  
晉國以寧諸侯敬服皆有德故也以穆軀形方之二子  
猶悉賢之昔臣嘗行臨淄市見屠商焉肩脩八尺鬚髯  
如戟面正紅白市之男女未有敬之者無德故也王曰  
是所謂祖龍始者也祖龍始乃屠商姓名忱如先生之言於是乃

以管穆為臨淄宰

陳士義第十五

魏王遣使者奉黃金束帛聘子順為相

孔武後名斌字子順子高之子

子順謂使者曰若王信能用吾道吾道固為治世也雖疏食飲水吾猶為之若徒欲制服吾身委以重祿吾猶一夫爾則魏王不少於一夫子度魏王之心以告我使者曰魏國狹小乏於聖賢寡君久聞下風願委國先生親受教訓如肯降節豈惟魏國君臣是賴其亦社稷之

神祇實永受慶於是乃之魏魏王郊迎謂子順曰寡人不肖嗣先君之業先生聖人之後道德懿邵幸見顧臨願圖國政對曰臣羈旅之臣慕君高義是以戾此君辱覲而問以政事敢不敬受君之明令 魏王朝羣臣問理國之所先季文對曰惟在知人王末之應子順進曰知人則哲帝堯所病故四凶在朝鯀任無功夫豈樂然哉人難知故也今文之對不稱吾君之所能行而乃欲強吾君以聖人所難此不可行之說也王曰先生言之

對曰當今所急在修仁尚義崇德敦禮以接鄰國而已  
昔舜命衆官群臣競讓德禮之致也苟使朝臣皆有推  
賢之心主雖不知人則臣位必當若皆以知人為治則  
人主宜未過堯且其目所不見者亦必漏矣王曰善矣  
秦王得西戎利刀以之割玉如割木焉以示東方諸  
侯魏王問子順曰古亦有之乎對曰周穆王大征西戎  
西戎獻鋗鋧之劍火浣之布其劍長尺有咫鍊鋼赤劍  
用之切玉如泥焉是則古亦有也王曰火浣之布若何

對曰周書火浣布垢必投諸火布則火色垢乃灰色出  
火振之皚然疑乎雪焉王曰今何以獨無對曰秦貪而  
多求求欲無厭是故西戎閉而不致此以素防絕之也  
然則人主貪欲乃異物所以不至不可不慎也 魏王

曰吾聞道士登華山則長生不死意亦願之對曰古無是  
道非所顧也王曰吾聞信之對曰未審君之所聞親聞  
之於不死者耶聞之於傳聞者耶君聞之於傳聞者妄  
也若聞之於死者今安在在者君學之勿疑不在者

君勿學無疑 李由之母少寡與李音竊相好而生由  
由有才藝仕於魏王甚愛之或曰李由母姦不知其父  
不足貴也王以告由且曰吾不以此賤子也雖然古之  
聖賢亦有似子者乎吾將舉以折毀子者李由對曰今  
人不通於遠在臣欲言誰爾且孔子少孤則亦不知其  
父者也孔子母死殯於五父之衢人見之皆以為孤墓  
問鄒曼父之母得合葬於防此則聖人與臣同者也王  
笑曰善子順聞之間魏王曰李由安得斯言王曰假以

自顯無傷也對曰虛造謗言以誣聖人非無傷也且夫  
明主之於臣惟德所在不以小疵妨大行也昔鬪子文  
生於淫而不害其為令尹今李由可則寵之何患於人  
之言而使橫生不然之說若欺有知則有知不受若欺  
凡人則凡人無知必亦問臣則臣亦不為君之故誣祖  
以顯由也如此羣臣更知由惡此必聚矣所謂求白潔  
而益其垢猶抱石以救溺愈不濟矣 魏王使相國修  
好鄰國遂連和於趙趙王既賓之而燕問子順曰今寡

人欲來北狄不知其所以然答曰誘之以其所利而與之通市則自至矣王曰寡人欲因而弱之若與交市分我國貨散於夷狄是彊之也可乎答曰夫與之市者將以我無用之貨取其有用之物是故所以弱之之術也王曰何謂我之無用彼之有用答曰衣服之物則有珠玉五綵飲食之物則有酒醪五熟五味也此即我之所有而彼之所利者也夷狄之貨唯牛馬旃裘弓矢之器是其所饒而輕以與人者也以吾所有易彼所饒如斯不

已則夷狄之用將糜於衣食矣殆可舉捶而驅之豈徒  
弱之而已乎趙王曰敬受教 枚產魏人問子順曰臣遺

於財聞猗頓善殖貨欲學之然先生同國也當知其術  
願以告我荅曰然知之猗頓魯之窮士也耕則常飢桑  
則常寒聞陶朱公富徃而問術焉朱公告之曰子欲速  
富當畜五牸於是乃適西河大畜牛羊于猗氏之南十  
年之間其滋息不可計貲擬王公馳名天下以興富於  
猗氏故曰猗頓且夫為富者非惟一術今子徒問猗頓

何也枚產曰亦將問之於先生也荅曰吾貧而子問以富術縱有其術是不可用之術也昔人有言能得長生者道士聞而欲學之比徃言者死矣道士高蹈而恨夫所欲學學不死也其人已死而猶恨之是不知所以為學也今子欲求道貨而問術於我我且自貧安能教子以富乎子之此問有似道士之學不死者也 東里問魏空腹而好自賢欲自親於子順子順不下或曰夫君子之交於世士亦取其一節而已東問子疏達亮直大

丈夫也求為先生役而先生無意接之斯者無乃非周公之交人乎子順曰此吾所以行周公之行也夫東間子外質頑拙有似疏直然內懷容媚詭魅非大丈夫之節也若其度骸稱膚面目鬚眉實美於人聖人論士不以為貴者無益於德故也然東間子中不應外侮慢世士即所謂愚人而謂人為愚者也持其虛狀以不德於人此乃周公之所罪何交之有宮他魏見子順曰他困貧賤將欲自託富貴之門庶克免乎子順曰夫富而

可以託貧賤而可以寄賤者天下寡矣非信義君子明  
識窮達則不可今子所欲託者誰也宮他曰將適趙公  
子子順曰非其人矣雖好養士自奉而已終弗能稱也  
宮他曰將適燕相國子順曰彼徒兄弟甥舅各濟其私  
無求賢之志不足歸也宮他曰將適齊田氏子順曰齊  
大國也其士大夫皆有自多之心不能容子也他曰然  
則何向而可子順曰吾勿識也宮他曰惟先生知人顧  
告所擇將往庇焉子順曰濟子之欲則宜若郈成子者

也。背郈成子自魯聘晉，過乎衛，右宰穀臣止而觴之。陳樂而不作，送以寶璧。反過而不辭。其僕曰：「日者右宰之觴吾子甚歡也。今過而不辭，何也？」成子曰：「夫止而觴我，與我歡也。陳樂而不作，告我哀也。送我以璧，寄之我也。若由此觀之，衛其有亂乎？」背衛三十里，聞審喜作難。右宰死之，還車而臨。三舉而歸，反命于君，乃使人迎其妻子。隔宅而居之，分祿而食之。其子長而反其璧。夫子聞之，曰：「智可與徵謀，仁可與託孤，廉可以寄財者，其郈成子也。」

子之謂乎今子求若人之比庇焉可也官他曰循先生  
之言舍先生將安之請從執事子順辭不得已乃言之  
魏王而升諸朝 子順相魏改嬖寵之官以事賢才奪  
無任之祿以賜有功諸喪職秩者不悅乃造謗言文咨  
魏人以告且曰夫不害前政而有成就與變之而起謗哉  
子順曰民不可與慮始久矣古之善為政者其初不能  
無謗子產相鄭三年而後謗止吾先君之相魯三月而  
後謗止今吾為政日新雖不能及聖賢庸知謗止獨無

時乎文咨曰子產之謗嘗亦聞之未識先君之謗何也  
子順曰先君初相魯魯人謗誦曰麌裘而帝投之無戾  
芾之麌裘投之無郵及三月政成化既行民又作誦曰  
袞衣章甫實獲我所章甫袞衣惠我無私文咨喜曰乃  
知先生亦不異乎聖賢矣 魏王謂子順曰吾欲致天  
下之士奈何子順對曰昔周穆王問祭公謀父曰吾欲  
得天下賢才對曰去其帝王之色則幾乎得賢才矣今  
臣亦請君去其尊貴之色而已王曰吾欲得無欲之士

為臣何如子順曰人之可使以有欲也故欲多者其所  
得用亦多欲少者其所得用亦少夫夷齊無欲雖文武  
不能制君安得而臣之

論勢第十六

魏王問相國曰今秦負強以無道陵天下天下莫不患  
寡人欲割國之半以親諸侯求從事於秦可乎子順對  
曰以臣觀之殆無益也今天下諸侯畏秦之日久矣數  
被其毒無欲復之之志心無所計委國於游說之士游

說之士挾強秦以為資賣其國以收利义手服從曾不能制如君之謀未獲其利而祇為名適足以速秦之首誅則無以得之不如守常以須其變也王曰秦其遂有天下乎對曰必然焉雖然取不以道得不以道自古以來未有能終之者五國西誅秦子順謂市丘子曰此秦未入境而還諸侯留兵於成臯子順謂市丘子曰此師楚為之主今兵罷而不散殆有異意君其備之市丘子曰先生幸而教之願以國寄先生子順許諾遂見楚王曰王約五

國而西伐秦事既不集又久師於市丘謗君者或以君  
欲攻市丘以償兵費天下之士且以是輕君而重秦又  
且不義君之為矣王可不卜爻乎楚王曰奈何子順曰  
王出令使五國勿攻市丘五國重王則聽王之令矣不  
重王則且反王之令而攻市丘以此卜五國交王之輕  
重必明矣楚王敬諾而五國散 趙間魏將以求親於  
秦子順謂趙王曰趙悼襄王此君之下吏計過也比目之魚  
所以不見得於人者以偶視而俱走也今秦有兼呑天

下之志日夜伺間不忘於側息也趙魏與之隣接而強弱不敵秦所以不敢圖并趙魏者徒以二國併目周旋者也今無故自離以資强秦天下拙謀無過此者故臣曰君之下吏計過也夫連雞不能上捷亦猶二國構難不能自免於秦也願王熟慮之趙王曰敬受教 韓與魏有隙子順謂韓王曰昭釐侯一世之明君也

韓宣惠  
王乃昭

釐侯之子申不害一世之賢相也韓與魏敵侔之國而釐侯

執圭見梁君者非好卑而惡尊慮過而計失也與嚴敵

為鄰而動有滅亡之變獨勁不能支二難故降心以相  
從屈已以求存也申不害慮事而言忠臣也昭釐侯聰  
而行之明君也今韓弱於始之韓魏弱於始之魏秦強  
於始之秦而背先人之舊好以區區之衆居二敵之間  
非良策也齊楚遠而難恃秦魏呼吸而至舍近而求遠  
是以虛名自累而不免近敵之困者也為王計者莫如  
除小忿全大好也吳越之人同舟濟江中流遇風波其  
相救如左右手者所患同也今不恤所同之患是不如

吳越之舟人也韓王曰善秦兵攻趙魏大夫以為於  
魏便子順曰何謂曰勝趙則吾因而服焉不勝趙則可  
乘敝而擊之子順曰不然秦自孝公以來戰未嘗屈今  
皆良將何敝之乘大夫曰縱其勝趙於我何損鄰之不  
修國之福也子順曰秦貪暴之國也勝趙必復他求吾  
恐於時受其師也先人有言燕雀處屋子母相哺煦煦  
然其相樂也自以為安矣竈突炎上棟宇將焚燕雀顏  
不變不知禍之及已也今子不悟趙破患將及已可以

人而同於燕雀乎 齊攻趙圍廩丘趙使孔青帥五萬  
擊之尅齊軍獲戶三萬趙王詔勿歸其戶將以困之子  
順聘趙問王曰不歸戶其困何也曰其父兄子弟悲苦  
無已廢其產也子順曰非所以困之也死一也歸戶與  
不悲苦胡異焉以臣愚計貧齊之術乃宜歸戶王曰何  
謂對曰使其家遠來迎戶不得事農一費也歸所葬使  
其送死終事二費也二年之中喪卒三萬三費也欲無  
困貧不能得已王曰善既而齊大夫聞其子順之謀曰

君子之謀其利溥哉 子順相魏凡九月陳大計輒不用乃喟然嘆曰不見用是吾言之不當也言不當於主而居人之官食人之祿是尸利也尸利素餐吾罪深矣退而以病致事魏王遣使入其館謝曰寡人昧於政事不顯明是非以啟罪於先生今知改矣願先生為百姓故幸起而教之辭曰臣有犬馬之疾不任國事苟得從四民之列子弟供魏國之征乃君惠也敢辱君命以速刑書人謂子順曰王不用子子其行乎答曰吾將行如刑書人謂子順曰王不用子子其行乎答曰吾將行如

之山東則山東之國將并於秦秦為不義義所不入遂  
寢于家秦急攻魏王恐或謂子順曰如之何荅曰吾  
私有計然豈能賢于執政故無言焉魏王聞之駕如孔  
氏親問焉曰國亡矣如之何對曰夫棄之不如用之之  
易也死之不如棄之之易也人能棄之弗能用也能死  
之不能棄也今王亡地數百里亡城數十而患不解是  
王棄之非用之也秦之強天下無敵魏之弱甚矣而王  
是以質秦景閔王為太子時嘗質于秦此王能死不能棄之也是重

過也若能用臣之計則虧地不足傷國卑體不足苦身  
患除怨報矣今秦四境之內執政以下固曰與嫪毐乎  
與呂氏乎門閭之下廊廟之上猶皆如是今王誠能割  
地賂秦以為嫪毐功卑身尊秦以固嫪毐王是以國贊  
嫪毐也則嫪毐勝矣於是太后之德王也深如骨肉王  
之交最為天下之上矣孰不棄呂氏而從嫪毐天下皆  
然則王怨必報矣

按此策甚疎必非子順語

執節第十七

趙孝成王問曰昔伊尹為臣而放其君其君不怨何行  
而得乎此也子順荅曰伊尹執人臣之節而弼其君以  
禮亦行此道而已矣王曰方以放君為名而先生稱禮  
何也子順曰以禮括其君使入于善也曰其說可得聞  
乎荅曰其在商書太甲嗣立而干冢宰之政伊尹曰惟  
王舊行不義習與性成予不狎于不順王始即桐邇于  
先王其訓罔以後人迷王往居憂允思厥祖之明德是  
言太甲在喪不明乎人子之道而欲知政於是伊尹使

之居桐近湯之墓處憂哀之地放之不俾知政三年服竟然後反之即所以奉禮執節事太甲者也率其君以義強其君以孝道未有行此見怨也王曰善哉我未之聞也 魏安釐王問子順曰馬回之為人雖少才文梗梗亮直一作綱有大丈夫之節吾欲以為相可乎答曰知臣莫若君何有不可至於亮直之節臣未明也王曰何故答曰聞諸孫卿云其為人也長目而豕視者必體方而心圓每以其法相人千百不失臣見回非不偉其體

幹也然甚疑其自王卒用之三月果以諂得罪 新垣  
固謂子順曰賢者所在必興化致治今子相魏未聞異  
政而即自退其有志不得白何去之速也荅曰以無異  
政所以自退也且死病無良醫今秦有吞食天下之心  
以義事之固不獲安救亡不暇何化之興昔伊摯在夏  
呂望在商而二國不理豈伊呂之不欲哉勢不可也當  
如今日山東之國弊而不振三晉割地以求安二周折  
節而入秦燕齊宋楚已屈服矣以此觀之不出二十年

天下盡為秦乎 季節見於子順子順賜之酒辭問其故對曰今日家之忌日也 故不敢飲子順曰飲也

禮忌日不

樂而已未有無飲者 禮雖服衰麻見於君及先生與之梁肉無辭

所以敬尊長而不敢遂其私也 忌日方於有服則輕矣

魏安釐王問天下之高士子順曰世無其人也抑可

以為次其魯仲連乎王曰魯仲連強作之者非體自然

也答曰人皆作之作之不止乃成君子文武欲作堯舜

而至焉昔我先君夫子欲作文武而至焉作之不變習

與體成習與體成則自然矣 虞卿著書名曰春秋魏齊曰子無然也春秋孔聖所以名經也今子之書大抵談說而已亦以為名何答曰經者取其事常也可常則為經矣且不為孔子其無經乎齊問子順子順曰無傷也魯之史記曰春秋經因以為名焉又晏子之書亦曰春秋吾聞泰山之上封禪者七十有二君其見稱述數不盈十所謂貴賤不嫌同名也 邯鄲之民以正月之旦獻雀於趙王而綴之以五絲趙王大悅申叔以告子

順曰王何以為也對曰正旦放之示有生也子順曰此委巷之鄙事爾非先王之法也且又不令申叔曰敢問何謂不令答曰夫雀者取其名焉則宜受之於上不宜取之於下下人非所得制爵也而王悅此殆非吉祥矣昔號公祈神神賜之上田是失國而更受田之祥也今以一國之王受民之雀將何悅哉申叔問曰犬馬之名皆因其形色而名焉惟韓盧宋鵠獨否何也子順答曰盧黑色鵠白黑色非色而何魏公子無忌死韓君

將親弔焉其子榮之以告子順子順曰必辭之禮鄰國君弔君主之今君不命子則子無所受其君也其子辭韓韓君乃止子高以為趙平原君霸世之士惜其不遇時也其子子順以為衰世之好事公子無伯相之才也申叔問子順曰子之家长有道先生既論之矣今子易之是非焉在答曰言貴盡心亦各有所見也若是非則明智者裁之申叔問子順曰禮為人臣三諫不從可以稱其君之非乎答曰禮所不得也曰叔也昔者逮

事有道先生問此義焉而告叔曰得稱其非者所以使天下人君不敢遂其非也子順曰然吾亦聞之是亡考起時之言非禮意也禮受放之臣不說人以無罪先君夫子曰事君欲諫不欲陳言不欲顯君之非也申叔曰然則晏子叔向皆非禮也荅曰此二大夫相與私燕言及國事未以為非禮也晏子既陳屢賤而踊貴於其君其君為之省刑然以及叔向叔向聽晏子之私又承其間所宜亦答以其事也 魏王問子順曰寡人聞昔者

上天神異后稷而為之下嘉穀周以遂興往中山之地  
無故有穀非人所為云天雨之反亡國何故也荅曰天  
雖至神自古及今未聞下穀與人也詩美后稷能大教  
民種嘉穀以利天下故詩曰誕降嘉種猶書所謂稷降  
播種農殖嘉穀皆說種之其義一也若中山之穀妖怪  
之事非所謂天祥也 趙王問相於平原君平原君曰  
鄒文可趙人王曰其行如何對曰夫孔子高天下之高士  
也取友以行交游以道文與之遊稱曰好義王其用之

王卒不用後以平原君言問子順且曰先生知之乎荅曰先父之所交也何敢不知王曰寡人雖失之在前猶願聞其行於先生也荅曰行不苟合雖賤不渝君子人也王遂禮之固以老辭趙王問子順曰寡人聞孔氏之世自正考父以來儒林相繼仲尼重之以大聖自茲以降世業不替天下諸侯咸資禮焉先生承其緒作二國師從古及今載德流聲未有若先生之嗣率由前訓將與天地相敝矣荅曰若先祖父並稟聖人之性如君

王之言也至如臣者學行不敏寄食於趙祿仕於魏幸遇二國之君寬以容之若乃師也未敢承命假令賴君之願後世克祚不忝前人不泯祖業豈徒一家之賜哉亦天下之慶也王曰必然必然

詰墨第十八

墨翟著書誣稱孔晏  
之事故孔辭詰辨之

墨子稱景公問晏子以孔子而不對又問三皆不對公曰以孔子語寡人者衆矣俱以為賢人今問子而不對何也晏子曰嬰聞孔子之荆知白公謀而奉之以石乞勒下亂上教臣弑君非聖賢之行也

詰之曰楚昭王之世夫子應聘如荆不用而反周旋乎

陳宋齊衛楚昭王卒惠王立十年令尹子西乃召王孫

勝以為白公

史云  
二年

是時魯哀公十五年也夫子自衛反

魯居五年矣白公立一年然後乃謀作亂亂作在哀公十六年秋也夫子已卒十旬矣墨子雖欲謗毀聖人虛造妄言奈此年世不相值何

墨子曰孔子之齊見景公公悅之封之以尼谿晏子曰不可夫儒浩居而自順立命而怠事崇喪遂哀盛用繁禮其道不可以治國其學不可以尊家公曰善

詰之曰即如此言晏子為非儒惡禮不欲崇喪遂哀也

察傳記晏子之所行未有以異於儒焉又景公問所以為政晏子答以禮云景公曰禮其可以治乎晏子曰禮於政與天地並此則未有以惡於禮也晏桓子卒晏嬰斬衰枕草苴絰帶杖菅菲食粥居於倚廬遂哀三年此又未有以異於儒也若能以口非之而躬行之晏子所弗為

墨子曰孔子怒景公之不封己  
乃樹鴻夷子皮於田常之門

詰之曰夫樹人為信已也記曰孔子適齊惡陳常而終

不見即田常病之亦惡孔子交相惡而又任事其然矣常

記又曰陳常弑其君孔子齋戒沐浴而朝請討之觀其終不樹子皮審矣

墨子曰孔子為魯司寇舍公家而奉季孫

詰之曰若以季孫為相司寇統焉奉之自法也若附意季孫季孫既受女樂則孔子去之季孫欲殺囚則孔子赦之非苟順之謂也

墨子曰孔子厄於陳蔡之間子路烹豚孔子不問肉之所由來而食之刺人之衣以沽酒孔子不問酒之

所由來  
而飲之

詰之曰所謂厄者沽酒無處藜羹不粒乏食七日若烹豚飲酒則何言乎厄斯不然矣且子路為人勇於見義縱有豚酒不以義不取之可知也又何問焉

墨子曰孔子諸弟子子貢季路輔孔悝以亂衛陽虎亂魯佛肸以中牟叛漆雕開形殘

詰之曰如此言衛之亂子貢季路為之耶斯不待言而了矣陽虎欲見孔子孔子不見何弟子之有佛肸以中牟叛召孔子則有之矣為孔子弟子未之聞也且漆雕

開形殘非行已之致何傷於德哉

墨子曰孔子相魯齊景公患之謂晏子曰鄰有聖人國之憂也今孔子相魯為之若何晏子對曰君其勿憂彼魯君弱主也孔子聖相也不如陰重孔子欲以相齊則必強諫魯君魯君不聽將適齊君勿受則孔子困矣

詰之曰按如此辭則景公晏子畏孔子之聖也上乃云非聖賢之行上下相反若晏子悖可也否則不然矣

墨子曰孔子見景公公曰先生素不見晏子乎對曰晏子事三君而得順焉是有三心所以不見也公告晏子晏子曰三君皆欲其國安是以嬰得順也聞君子獨立不慙于影今孔子伐樹削迹不自以為辱身

窮陳蔡不自以為約始  
吾望儒貴之今則疑之

誥之曰若是乎孔子晏子交相毀也小人有之君子則否孔子曰靈公汙而晏子事之以潔莊公怯而晏子事之以勇景公侈而晏子事之以儉晏子君子也梁丘據問晏子曰事三君而不同心而俱順焉仁人固多心乎晏子曰一心可以事百君百心不可以事一君故三君之心非一也而嬰之心非三也孔子聞之曰小子記之晏子以一心事三君君子也如此則孔子譽晏子非所

謂毀而不見也景公問晏子曰若人之衆則有孔子乎  
對曰孔子者君子行有節者也晏子又曰盈成匡父之  
孝子兄之弟弟也其父尚為孔子門人門人且以為貴  
則其師亦不賤矣是則晏子亦譽孔子可知也夫德之  
不修已之罪也不幸而屈於人已之命也伐樹削迹絕  
糧七日何約乎哉若晏子以此而疑儒則晏子亦不足  
賢矣

墨子由景公祭路寢聞哭聲問梁丘據對曰魯孔子  
之徒也其母死服喪三年哭泣甚哀公曰豈不可哉

晏子曰古者聖人非不能也而不為者  
知其無補於死者而深害生事故也

詰之曰墨子欲以親死不服三日哭而已於意安者卒自行之空用晏子為引而同乎已適證其非耳且晏子服父禮則無緣非行禮者也

曹明問子魚曰

子魚觀孔鮒

子詰墨者之辭事義相反墨者妄矣假使墨者復起對之乎荅曰苟得其理雖百墨吾益明白焉失其正雖一人猶不能當前也墨子之所引者矯晏子晏子之善吾

先君先君之善晏子其事庸盡乎曹明曰可得聞諸子

魚曰昔齊景公問晏子曰吾欲善治可以霸諸侯乎對曰官未具也臣亟以聞而君未肯然也臣聞孔子聖人然猶居處勑惰廉隅不修則原憲季羔侍氣鬱而疾志意不通則仲由卜商侍德不盛行不勤則顏閔冉雍侍今君之朝臣萬人立車千乘不善之政加于下民者衆矣未能以聞者故曰官未備也此又晏子之善孔子者也子曰晏平仲善與人交久而敬之此又孔子之貴晏子者也曹明曰吾始謂墨子可疑今則決妄不疑矣

獨治第十九

子魚生於戰國之世長於兵戎之間然獨樂先王之道  
講習不倦季則謂子魚曰丈夫不生則已生則有云為  
於世者也今先生淡泊世務修無用之業當身不蒙其  
榮百姓不獲其利竊為先生不取也子魚曰不如子之  
言也武者可以進取文者可與守成今天下將擾擾焉  
終必有所定子修武以助之取吾修文以助之守不亦  
可乎且吾不才無軍旅之任徒能保其祖業優游以卒

歲者也 秦始皇東并子魚謂其徒叔孫通曰子之學可矣盍仕乎對曰臣所學於先生者不用於今不可仕也子魚曰子之材能見時變今為不用之學殆非子情也叔孫通遂辭去以法仕秦 尹曾謂子魚曰子之讀先王之書將奚以為答曰為治也世治則助之行道世亂則獨治其身治之至也 陳餘謂子魚曰秦將滅先王之籍而子為書籍之主其危矣子魚曰顧有可懼者必或求天下之書焚之書不出則有禍吾將先藏之以

待其求求至無患矣 子魚居魏與張耳陳餘相善耳  
餘魏之名士也秦滅魏求耳餘懼走會陳勝吳廣起兵  
於陳欲以誅秦餘謂陳王曰今必欲定天下取王侯者  
其道莫若師賢而友智孔子之孫今在魏居亂世能正  
其行修其祖業不為時變其父相魏以聖道輔戰國見  
利不易操名諸侯世有家法其人通材足以幹天下博  
知足以慮未形必宗此人天下無敵矣陳王大悅遣使  
者齎千金加束帛以車三乘聘焉耳又使謂子魚曰天

下之事已可見矣今陳王興義兵討不義子宜速來以集其事王又聞子賢欲諮良謀虛意相望也子魚遂往陳王郊迎而執其手議世務子魚以霸王之業勸之王悅其言遂尊以博士為太師諮度焉 子魚名鮒甲陳人或謂之子鮒或稱孔甲陳勝既立為王其妻之父兄往焉勝以衆賓待之長揖不拜無加其禮其妻之父怒曰佑亂僭號而傲長者不能久矣不辭而去陳王跪謝遂不為顧王心慙焉遂適博士太師之館而言曰予雖

丈夫哉然塞於禮義以啟於姻姪惟先生幸訓誨之使  
免於戾可乎子魚曰王所問者善也敢固無辭以對乎  
今以禮言耶則禮無不拜且宗族婚媾又與衆賓異敬  
者也敬而加親自古以然也王曰雖已失之於前庶欲  
收之於後也顧先生修明其事必遵奉焉對曰昔唐堯  
內親九族外協萬邦禮以婚為昆弟妻之父母為外舅  
姑由是明之則拜之可知夫婚親之義非宗賢之類也  
雖自己臣莫敢不敬昔魏信陵君嘗以此質臣之父臣

之父曰於諸母之昆弟妻之諸父則以親配德年以上雖拜之可也幼於己者揖之可也此出於人情而可常者也王曰善哉請問同姓而服不及者其制何耶對曰先王制禮雖國君有合族之道宗人掌其列繼之以姓而無別駁之以食而無殊名隨本屬之隆殺屬近則死為之免屬遠則弔之而已禮之正也是故臣之家哭孔氏之別姓於弗父之廟哭孔氏則於夫子之廟此有據而然也周之道雖百世婚姻不通重先君之同體也王

跪曰先生之言厥義博哉寡人雖固敢不盡心

問軍禮第二十

陳王問太師曰行軍之禮可得備聞乎答曰天子有道  
禮樂征伐自天子出自天子出必以歲之孟秋賞軍師  
武人于朝簡練傑俊任用有功命將選士以誅不義於  
是孟冬以級授軍司徒執扑北面而誓之誓于社以習  
其事先期五日太史筮於祖廟擇吉日齋戒告于郊社  
稷宗廟既筮則獻兆於天子天子使有司以牲特告社

告以所征之事而受命焉舍奠于帝學以受成然後乃  
類于上帝柴于郊以出以齋車遷廟之主及社主行大  
司馬職奉之無遷廟主則以幣帛皮圭告于祖禰謂之  
主命亦載齋車凡行主皮圭幣帛皆每舍奠焉而後就  
館主車止于中門之外外門之內廟主居于道左社主  
居于道右其所經名山大川皆祭告焉及至敵所將戰  
太史卜戰日卜右御先期三日有司明以敵人罪狀告  
之史史定誓命戰日將帥陳列車甲卒伍于軍門之前

有司讀誥誓言使周定三令五申既畢遂禱戰祈克于上帝然後即敵將士戰全已克敵史擇吉日復禱于所征之地柴于上帝祭社奠祖以告克者不頓兵傷士也戰不克則不告也凡類禴皆用甲丙戊庚壬之剛日有司簡功行賞不稽于時其用命者則加爵受賜于祖奠之前其奔北犯令者則加刑罰戮于社主之前然後鳴金振旅有司徧告捷于時所有事之山川既至舍于國外三日齋以特牛親格于祖禰然後入設奠以反主若主

命則卒奠斂主埋之于廟兩階間反社主如初迎之禮  
舍奠于帝學以訊馘告大享於羣吏用備樂饗有功於  
祖廟舍爵策勲焉謂之飲至天子親征之禮也陳王曰  
其命將出征則如之何太師曰古者大將受命而出則  
忘其國即戎師陣則忘其家故天子命將出征親潔齋  
盛服設奠于祖以詔之大將先入軍吏畢從皆北面再  
拜稽首而受天子當階南面命授之節鉞大將受天子  
乃東向西面而揖之亦弗御也然後告大社冢宰執蜃

宜於社之右南面授大將北面稽首再拜而受之  
承所頒賜於軍吏其出不類其克不禡戰之所在有大  
山川則祈焉禱克于五帝捷則報之振旅復命簡異功  
勤親告廟告社而後適朝禮也王曰將居軍中之禮勝  
敗之變則如之何太師曰將帥尚左士卒尚右出國先  
鋒入國後刃介冑在身執銳在列雖君父不拜若不幸  
軍敗則驛騎赴告於載橐輶天子素服哭于庫門之外  
三日大夫素服哭于社亦如之亡將失城則皆哭七日

天子使使迎于軍命將帥無請罪然後將帥結草自縛袒右肩而入蓋喪禮也王曰行古禮如何太師曰古之禮固為於今也有其人行其禮則可無其人行其禮則民弗與也

荅問第二十一

陳人有武臣謂子鮒曰夫聖人者誠高材美稱也吾謂聖人之知必見未形之前功垂於身後立教而戾夫弗犯吐言而辯士不破也子之先君可謂當之矣然韓子

立法其所以異夫子之謂者紛如也予每探其意而校  
其事持久歷遠過姦勸善韓氏未必非孔氏未必得也  
吾今而後乃知聖人無世不有前聖後聖法制固不一  
也若韓非者亦當世之聖人也子鮒曰子信之為然是  
固未免凡俗也今世人有言高者必以極天為稱言下  
者必以深淵為名是資勢之談而無其實者也好事而  
未鑿也必言經以自輔援聖以自賢欲以取信於群愚  
而度其說也若諸子之書其義皆然吾先君之所自志

也請畧說一隅而君子審其信否焉武臣曰諾子鮒曰  
乃者趙韓共并知氏趙襄子之行賞先加具臣而後有  
功韓非書云夫子善之引以張本然後難之豈有不似  
哉然實詐也何以明其然昔我先君以春秋哀公十六  
年四月己丑卒至二十七年荀瑤與韓趙魏伐鄭遇東  
垣而還是時夫子卒已十一年矣而晉四卿皆在也後  
悼公十四年知氏乃亡此先後甚遠而韓非公稱之曾  
無怍意是則世多好事之徒皆非之罪也故吾以是默

口於小道塞耳於諸子久矣而子立尺表以度天植寸  
指以測淵矇大道而不悟信誣說以疑聖殆非所望也  
武臣义手跪謝施施而退遂告人曰吾自以為學之博  
矣而可否於孔氏方知學不在多要在精之也 陳王  
問太師曰寡人不得為賢所推而得南面稱孤其幸多  
矣今既賴二三君子且又欲規久長之圖何施而可荅  
曰信王之言萬世之福也敢稱古以對昔周代殷乃興  
滅繼絕以為政首今誠法之則六國定不攜抑久長之

本王曰周存二代別有三恪其事云何荅曰封夏殷之後以為二代紹虞帝備為三恪恪敬也禮之如賓客也非謂特有二代別有三恪也凡所以立二代者備王道通三統也王曰三統者何荅曰各自用其正朔二代與周是謂三統王曰六國之後君吾不能封也遠世之王於我何有吾自舉不及於周又安能純法之乎 陳王涉讀國語言申生事顧博士曰始予信聖賢之道乃今知其不誠也先生以為何如荅曰王何謂哉王曰晉

獻惑聽讒而書又載驪姬夜泣公而以信入其言人之  
夫婦夜處幽室之中莫能知其私焉雖黔首猶然况國  
君乎予以是知其不信乃好事者為之辭將欲成其說  
以誣愚俗也故使予并疑於聖人也博士曰不然也古  
者人君外朝則有國史內朝則有女史舉則左史書之  
言則右史書之以無諱示後世善以為式惡以為戒廢  
而不記史失其官故凡若晉侯驪姬牀第之私房中之  
事不得捨焉若夫設教之言驅群俗使人入道而不知

其所以者也今此皆書實事累累若貫珠可無疑矣王  
曰先生真聖人之後風也今幸得聞命寡人無過焉

陳王涉使周章為將西入關以誅秦秦使將章邯拒之  
陳王以秦國之亂也有輕之之意勢若有餘而不設敵  
備博士太師諫曰章邯秦之名將周章非其敵也今王  
使章需然自得而不設備臣竊惑焉夫雖天之所舍其  
禍福吉凶大者在天小者由人今王不修人利以應天  
祥若跌而不振悔之無及也王曰寡人之軍先生無累

也請先生息慮也又諫曰臣聞兵法無恃敵之不我攻  
恃吾之不可攻也今恃敵而不自恃非良計也王曰先  
生所言計策深妙予不識也先生休矣已而告人曰儒  
者可與守成難與進取信哉博士他日復諫曰臣聞國  
大兵衆無備難恃一人善射百夫決拾章邯梟將卒皆  
死士也周章若懦使彼席卷來前莫有當其鋒者王曰  
先生所稱寡人昧昧焉願以人間近事喻之荅曰流俗  
之事臣所不忍也今王命之敢不盡情願王察之也臣

昔在梁梁人有陽由者其力扛鼎伎巧過人骨騰肉飛手搏躡獸國人懼之然無治室之訓禮教不立妻不畏憚浸相泄瀆方乃積怒妻坐於牀荅焉左手建杖右手制其頭妻亦奮恚因授以背使杖擊之而自撮其陰由乃仆地氣絕而不能興鄰人聞其凶凶也窺而見之趨而救之妻愈轢忿莫肯舍旃或發其裳然後乃放夫以無敵之伎力而劣於女子之手者何也輕之無備故也今王與秦角強弱非若由之夫妻也而輕秦過甚臣是

以懼故區區之心欲王備患之也王曰譬類枕佳然實  
不同也弗聽周章果敗而無後救邯遂進兵擊陳王師  
大敗博士凡仕六旬老于陳將歿戒其弟子曰魯天  
下有仁義之國也戰國之世講頌不衰且先君之廟在  
焉吾謂叔孫通處濁世而清其身學儒術而知權變是  
今師也宗於有道必有令圖歸必事焉

孔叢子卷中

欽定四庫全書叢要卷一萬二百二十九子部

孔叢子卷下

漢 孔臧 撰

連叢子上第二十二

叙書

家之族肩一世相承以至九世相魏居大梁

孔子生伯魚字鮒

生伋字子思伋生白字子上白生求字子家求生箕字子京箕生穿字子高穿生子順相魏自叔梁紇至子順

凡九始有三子焉長子之後承殷統為宋公中子之後

奉夫子祀為褒成侯小子之後彥以將事高祖有功封  
蓼侯其子臧嗣焉歷位九卿遷御史大夫辭曰臣世以  
經學為家轉相承作訓法然今俗儒繁說遠本雜以妖  
妄難可以教侍中安國安國孔忠之子受詔綴集古義臣乞為  
太常典臣家業與安國紀綱古訓使永垂來嗣孝武皇  
帝重違其意遂拜太常其禮賜如三公在官數年著書  
十篇而卒先時嘗為賦二十四篇四篇別不在集似其  
幼時之作也又為書與從弟及戒子皆有義故列之于

左

諫格虎賦

帝使亡諸大夫問乎下國下國之君方帥將士於中原車騎駢闐被行岡巒手格猛虎生縛羆犴昧而出見星而還國政不恤惟此為歡乃夸于大夫曰下國鄙固不知帝者之事敢問天子之格虎豈有異術哉大夫未之應因又言曰下國褊陋莫以娛心故乃闢四封以為藪圍境內以為林禽鳥育之驛驛淫淫晝則鳴嚦夜則

嗥吟飛禽起而翳日走獸動而審音犯之者其罪死驚

之者其刑深虞侯苑令是掌厥禁於是分幕將士營遮

榛叢戴星入野列火求蹤見虎自來乃往尋從張罝網

羅刃鋒驅檻車聽鼓鐘猛虎顛遽奔走西東怖駭內懷

迷冒怔忪耳目喪精值網而衝局然自縛或隻或雙車

徒朴讚咸稱曰工乃縛以絲組斬其爪牙支輪登較

與支

楷同言獲獸多可楷其軸輪登滿較式

高載歸家孟賁被髮瞋目躁猾紛

華故都邑百姓莫不于邁陳列路隅咸稱萬歲斯亦畋

獵之至樂也大夫曰順君之心樂矣然則樂之至也者  
與百姓同之謂夫兕虎之生與天地偕山林澤藪又其  
宅也被有德之君則不為害今君荒于遊獵莫恤國政  
驅民入山林格虎於其廷妨害農業殘天民命國政其  
必亂民命其必散國亂民散君誰與處以此為至樂所  
未聞也於是下國之君乃頓首曰臣實不敏習之日久  
矣幸今承誨請遂改之

楊柳賦

嗟茲楊柳先生後傷蔚茂炎夏多陰可涼伐之原野樹  
之中塘溉浸以時日引月長巨本洪枝條脩遠楊天繞  
連枝猗那其房或拳局以逮下或擢跡而接穹蒼綠葉  
累疊鬱茂翳沈蒙籠交錯應風悲吟鳴鵠集聚百變其  
音爾乃觀其四布運其所臨南垂太陽北被玄陰西奄  
梓園東覆果林規方冒乎半頃清室莫與比深於是朋  
友同好几筵列行論道飲燕流川浮觴殽核紛雜賦詩  
斷章合陳厥志考以先王賞恭罰慢事有紀綱洗憇酌

樽兕觥並揚飲不至醉樂不及荒威儀抑抑動合典常  
退坐分別其樂難忘惟萬物之自然固神妙之不如意  
此楊樹依我以生未寧一紀我賴以寧暑不御箠淒而  
涼清內蔭我宇外及有生物有可貴云何不銘乃作斯  
賦以叙斯情

鶲賦

季夏庚子思道靜居爰有飛鶲集我屋隅異物之來吉  
凶之符觀之歡然覽考經書在德為常棄常為妖尋氣

而應天道不踰昔在賈生有志之士忌茲鵬鳥卒用喪  
已咨我令考信道秉真變怪生家謂之天神修德滅邪  
化及其鄰禍福無門惟人所求聽天任命慎厥所修栖  
遲養志老氏之疇爵祿之求祇增我憂時去不索時來  
不逆庶幾中庸仁義之宅何思何慮自今勤劇

蓼蟲賦

季夏既望暑往涼還逍遙諷誦遂歷東園周旋覽觀憩  
於南藩覩茲茂蓼結葩吐榮猗那隨風綠葉紫莖爰有

蠕蟲厥狀似螟羣聚其間食之以生於是悟物託事推  
况乎人幼長斯蓼莫或知辛膏粱之子豈曰不云惟非  
德非義不以為家安逸無心如禽獸何逸心致驕驕必  
致亡匪惟辛苦乃丁大殃

與侍中從弟安國書

臧報侍中相知忿俗儒淫辭冒義有意欲校亂反正由  
來久矣然雅達博通不世而出流學守株比肩皆是衆  
口非非正將焉立每獨念至此夙夜反側誠懼仁弟道

非信於世而以獨知為愆也人之所欲天必從舊章潛於壁室正於紛擾之際歎爾而見俗儒結舌古訓復申豈非聖祖之靈欲令仁弟讚明其道以闡其業者哉且曩雖為今學亦多所不信惟聞尚書二十八篇取象二十八宿謂為至然也河圖古文乃有百篇耶如堯典說者以為堯舜同道弟素常以為雜有舜典今果如所論及成王道雷風周公信自在俗儒羣驅狗吠雷同不得其髣髴惡能明聖道之真乎知以今讐古之隸篆推科

半已定五十餘篇並為之傳云其餘錯亂文字磨滅不可分了欲垂待後賢誠合先君闕疑之義顧惟世移名制改變文體義類轉益難知以弟博洽溫敏既善推理又習其書而猶尚絕意莫肯垂留三思縱使來世亦有篤古碩儒其若斯何嗚呼惜哉先王遺典缺而不補聖祖之業分半而泯後之君子將焉取法假令顏閔不歿游夏更生其豈然哉不得已已貴復申之

與子琳書

告琳頃來聞汝與諸友書講肄學傳滋滋晝夜衍衍不忘善矣人之進道惟問其志取必以漸勤則得多山雷至柔石為之穿蝎蟲至弱木為之弊夫雷非石之鑿蝎非木之鑽然而能以微脆之形陷堅剛之體豈非積漸之致乎訓曰徒學知之未可多履而行之乃足佳故學者所以飾百行也侍中子國明達淵博雅學絕倫言不及利行不欺名動遵禮法少小長操故雖與羣臣並參侍見侍崇禮不供藜事獨得掌御唾壺朝廷之士莫不

榮之此汝親所見詩不云乎毋念爾祖聿修厥德又曰  
操斧伐柯其則不遠遠則尼父近則子國於以立身其  
庶矣乎

叙世

臧子琳位至諸吏亦博學問琳子黃厥德不修失侯爵  
大司徒光以其祖有功德而邑土廢絕分所食邑三百  
戶封黃弟茂為關內侯茂子子國生子印為諸生特善  
詩禮而傳之子印生仲驩為博士弘農守善春秋三傳

公羊穀梁訓諸生仲驩生子立善詩書少遊京師與劉歆友善嘗以清論議貶史丹史丹諸子並用事為是不仕以詩書教於闕里數百人子立生子元以郎校書時歆大用事而子元校書七年官不益故或譏以為不恤於進取惟揚子雲善之子元生子建與崔義幼相善長相親也義仕王莽為建新大尹數以世利勸子建仕子建答曰吾有布衣之心子有袞冕之志各從所好不亦善乎且昔與子幼同志故相友也今子以富貴為榮而

吾以貧賤為樂志已乖矣乖而相友非中情也請與子

辭遂歸鄉里

崔義當作毅字

光武中興天下未悉從化董憲彭

豐等部衆於鄒魯之間郡守上黨鮑府君君長患之是

時闕里無故荆棘叢生一旦自闢廣千數百步從舊講

堂坦然至里門府君大驚謂子建曰豈卿先君欲令太

守行饗禮助太守誅惡耶子建對曰其然府君曰為之

奈何對曰庠序之儀廢來久矣今誠修之民必觀焉且

憲豐為盜或聚或散非有堅固部曲也若行饗射之禮

內為禽之之備外示以簡易憲等無何依衆觀化可因而縛也府君從之用格憲等子建生仁以文學為議郎博士南海太守生子豐子豐以學行聞三府交命委質司空拜高第御史建初元年大旱天子憂之問羣臣政教得失子豐乃上疏曰臣聞為不善而災報得其應也為善而災至遭時運也陛下即位日新視民如傷而不幸耗旱時運之會爾非政教之所致也昔成湯遭旱因自責省故散積減御損膳而大有年意者陛下未為成

湯之事焉天子納其言而從之三日雨即降轉拜黃門侍郎典東觀事子豐生子和史作孔僖字仲和此書蓋孔氏子孫所作故不書名

大中大夫鮑彥曰人之性分氣度不同有體貌亢疏色厲矜莊儀容冰栗似若能斷而當事少決不遂其為者或性玄靜不與俗競氣不勝辭似若無能而涉事不顧臨危不撓者是為似若彊焉而不能勝似若弱焉而不可奪也君子觀之以表推內察容而度心所以得之也若是似類相亂如何取實乎子豐曰夫人者患在不

察也人之所綜物才志也慮協於理固以守之此之謂  
彊智足以通變明足以破偽情足以審疑果足以必志  
固可以先事而成功矣即所謂寬柔內思不報無道之  
彊豈待形氣之助乎若乃貌厲內荏高氣亢戾多意倨  
跡理不充分業不一定執志不果此謂剛愎非彊者也  
是故君子欲必其行由是論之彊弱之分不取於氣色  
明矣必也察志在觀其履事乎非定計於內而敏發於  
外孰能稱此彊名乎哉子豐曰夫物有定名而論有

一至是故有可以一言而得其極雖十言不能奪者惟  
析理即實為得不以濫麗費辭為賢也然而世俗之人  
聰達者寡隨聲者衆持論無主俯仰為資因貴勢而附  
從託浮說以為定不求之於本不考之於理故冗長溷  
穀之言而衆莫能折其中所以為口實而無得也夫論  
辨者貴其能別是非之理非巧說之謂也當要者訥言  
得理此乃辨也聽者由弗之察辭氣支離取喻多端幸  
較以類理不應實而聽者因形飾偽徒讚然之是所謂

以巧辭多喻為辨而莫識一言之別實者也人皆欲剖析分理揆度真偽固不知所以精之如自為得其謬惑莫之甚焉是故舉多敗事而寡特之知困於群醜也夫聰者不可亂以淫聲明者不可眩以邪色而世人不必聰明故有氣勢者益得之半無此二者損得之半也

子豐善於經學不好諸家書鮑彥與子豐名齊而業殊故謂子豐曰家書多才辭莫過淮南也讀之令人斷氣方自知為陋爾子豐曰試說其最工不可及者彥曰君

子有酒小人鼓缶雖不可好亦不可醜此語何如子豐  
曰不急爾彥曰且效作此語子豐曰君子樂醺小人擊  
朴雖不足貴亦不可賤君子舞象小人擊壤上化使然  
又何足賞吾能作數十曲但無益於世故不為爾鮑子  
於是屈而無辭

左氏傳義詁序

先生名竒字子異其先魯人即褒成君次孺第二子之  
後也孔霸字次孺家於茂陵以世學之門未嘗就遠方師也

惟兄君魚少從劉子駿受春秋左氏傳其於講業最明  
精究其義子駿自以才學不若也其或訪經傳於子駿  
輒曰幸問孔君魚吾已還從之諮詢矣由是大以春秋  
見稱當世孔奮字君魚  
霸之曾孫王莽之末君魚避地至大河之  
西依大將賣融為家常為上賓從容以論道為事是時  
先生年二十一矣每與其兄議學其兄謝服焉及世祖  
即祚君魚乃仕官至武都太守關內侯以清儉聞海內  
先生雅好儒術淡忽榮祿不願從政遂刪撮左氏傳之

難者集為義詁發伏闡幽讚明聖祖之道以祛後學者  
書未畢而早世不永宗人子通痛其不遂惜茲大訓不行于世乃校其篇目各如本第并序答問凡三十卷  
将来君子倘肯遊意幸詳錄之焉

連叢子下第二十三

元和二年三月孝章皇帝東巡過魯幸闕里以大牢祀  
聖師作六代之樂天子升廟西面羣臣在庭北面皆再  
拜天子進爵而後坐乃召諸孔丈夫年二十以上者六

十三人臨賜酒飯子和自陳曰臣草莽所蔽才非幹時行非絕倫託備先聖嗣世名學家陛下謬加拔擢徵臣蘭臺令史會值車駕東巡先禮聖師猥以餘福惠及臣宗誠非碎首所能報謝詔曰治何經對曰為詩書頗涉禮傳詔曰今日之會寧於鄉宗有光榮乎對曰非所敢當也臣聞明王聖主莫不尊師而貴道今陛下尊臣祖之靈貴臣祖之道親屈萬乘辱臨敝里此乃陛下所以崇聖也若夫顧其遺嗣得與群臣同受釐福此乃陛下

愛屋及烏惠下之道所以崇德作聖臣宗弗與於光榮  
非所敢承天子嘆曰非聖者子孫惡有斯言遂拜子和  
郎中詔隨車駕賜孔氏男女錢帛子和從還京師遂校  
書東觀其年十二月為臨晉令其友崔駰以其家卦林  
占之謂為不吉語子和曰盍辭乎

漢崔篆嘗著易林篆乃駰之祖故曰家

荅曰學不為人仕不擇官所以為吉也且卜以決疑不  
疑何卜吉凶由人而由卦林乎徑往之官三年秋八月  
天子巡后土登龍門子和自請從行在所天子識其狀

貌燕見移時賜帛十端還而九月既望寢疾不瘳乃命其二子留葬焉二子長曰長彥年十有二次曰季彥年十歲父之友西洛人姚進先有道徵不就養志於家長彥季彥常受教焉既除喪則苦身勞力以自衣食家有先人遺書兄弟相勉諷誦不倦于時蒲阪令汝南許君然造其宅勸使歸魯奉車二乘辭曰載柩而返則違父遺命舍父而去則心所不忍君然曰以孫就祖於禮為得願子無疑荅曰若以死有知也祖猶有鄰宗族父獨

留此不以劇乎吾以定矣遂還其車於是甘貧味道研  
精墳典十餘年間會徒數百故時人為之語曰魯國孔  
氏好讀經兄弟講誦皆可聽學士來者有聲名不過孔  
氏那得成長彥頗隨時為今學其時多為章句學季彥壹其家

業兼修史漢不好諸家之書

華陰張太常問何如斯

可謂備德君子季彥答曰性能沈邃則不可測志不在

小則不可度砥厲廉隅則不可越行高體卑則不可階

興事教業與言俱立捨己從善不恥服人交友以義不

慕勢利並立相下不倡游言若此可謂備德矣張生曰  
不有孝弟忠信乎荅曰別而論之則應此條總而目之  
則曰孝弟忠信張生聞是言喜而書之 魯人有同歲  
上計而死者欲為之服問於季彥季彥曰有恩好其總  
乎昔諸侯大夫共會事於王及以君命同盟霸主其死  
則有哭臨之禮今之上計並觀天子有交燕之歡同盟  
綿素上紀先君下錄子弟相敦以好相厲以義又數相  
往來特有私親雖比之朋友不亦可乎 崔駟學於太

學而糧乏鄧衛尉欲餼焉而未果季彥年九歲以其父  
命往見衛尉曰夫言不在多在於當理施不在豐期於  
救乏崔生臣父之執也不幸而貧公許賑之言既當理  
矣從來有日嘉貺未至或欲豐之然後乃致乎荅曰家  
物少須租入當猥送季彥曰公顧盼崔生欲分祿以周  
其無君之惠也必欲待君租入然後猥致則於崔生為  
贏非義崔生所不為也且今已乏矣而方須租入是猶  
古人欲決江河以救牛蹄之魚之類也鄧公曰諾 梁

人取後妻後妻殺夫其子又殺之季彥返魯過梁梁相曰此子當以大逆論禮繼母如母是殺母也季彥曰言如母則與親母不等欲以義督之也昔文姜與弑魯桓春秋去其姜氏傳曰不稱姜氏絕不為親禮也絕不為親即凡人爾且夫手殺重於知情知情猶不得為親則此下手之時母名絕矣方之古義是子宜以非司寇而擅殺當之不得為殺母而論以逆也梁相從之 弘農

太守皇甫威明問仲淵曰

即皇甫規仲淵乃季彥族

吾聞孔氏自三

父之後能傳祖之業者常在於叔祖今觀連叢所記信  
如所聞然則伯季之後弗克負荷矣荅曰不然也先君  
所以為業者非惟經傳而已可以學則學可以進則進  
可以止則止故曰無可無不可也蓋唯執行中庸其於  
得道非末嗣子孫所能及也是以先父各取所能能仕  
則仕能學則學自伯祖之子孫世仕有位季祖之子孫  
或學或仕或文或武所統不一故學不稽古仕無高官  
文非俎豆武非戰兵不專故也皇甫曰如高明之言是

故弗克負荷矣荅曰伯之子孫今其可仕季之子孫何所能仕所以世得聞焉且人之才聖受天有分若如君之論則成王伯禽雖致泰平皆當以不聖蒙弗克負荷之罪乎皇甫笑曰善既而或謂仲淵曰以古人推之自可如皇甫之言爾而子矜之何也皇甫雖口與子心實不與也荅曰吾其然然此君來言頗欲相侵故激至於此豈曰得道由不獲已也長孫尚書問季彥曰處士聖人之後也豈知聖人之德惡乎齊荅曰德行邈於世

智達秀於人幾於如此矣曰聖人者必能聞於無聲見  
於無形然後稱聖爾如處士所言大賢則能為之季彥  
曰君之論宜若未之近也夫有聲故可得而聽有形故  
可得而見若乃無聲雖師曠側耳將何聞乎無形雖離  
婁並照將何覩乎書曰惟狂克念作聖狂人念思道德  
猶為聖人聖人大賢之清者也賢人中人之清者也

孔大夫謂季彥曰

大夫乃孔星字元世

今朝廷以下四海之內皆

為章句內學

西漢士論以經術為內學諸子雜說為外學季彥之時方尚辭文乃以章句為內學

經術為外學而君獨治古義則不能不非章句非章句內學

則危身之道也獨善固不容於世今古義雖善時世所廢也而獨為之必將有患盍固已乎荅曰君之此言殆非所望也君以為學學知乎學愚乎大夫曰學所以求知也季彥曰君頻日聞吾說古義一言輒再稱善善其使人知也以為章句內學迂誕不通即使人愚也今欲使吾釋善善之知業習迂誕不通之愚學為人謀如此於義何居且吾子立論必析是非以是易非何傷之如

主上聰明庸知不欲兩聞其義博覽古今擇善從之以廣其聖乎吾學不要祿貴得其義爾復以此受患猶甘心焉先聖遺訓壁出古文臨淮傳義可謂妙矣而不在科策之例世人固莫識其奇矣斯業之所以不泯賴吾家世世獨修之也今君猥為祿利之故欲廢先君之道此殆非所望也若從君言是為先君之義滅於今日將使來世達人見今文俗說因嗤笑前聖吾之力此蓋為先人也物極則變此百年之外必當有明慎君子恨不

與吾同世者於是大夫悵然曰吾意實不及此也敢謝

不敏

楊太尉

楊震

問季彥曰吾聞臨晉君異才博聞周

合羣籍如世不歸大儒何荅曰不為祿學故也惡直醜

正實繁有徒辯經說義輒見憎疾但以所據者正故衆

人不能用爾免害為幸何大儒之能歸乎

季彥見劉

公客適有獻魚者公熟視魚歎曰厚哉天之於人也生

五穀以為食育鳥獸以為肴衆座僉曰誠如明公之教

季彥曰賤子愚意竊與衆君子不同以為不如明公之

教也何者萬物之生各稟天地未必為人人徒以知得而食焉故孝經曰天地之性人為貴貴有知也伏羲始嘗草木一日而遇七十二毒然後五穀乃形非天本為人而生也蚊蚋食人𧇵蟲食土非天故為蚊蚋生人為𧇵蟲生地也知此不然則五穀鳥獸之生本不為人可以為無疑矣公良久曰辨哉衆坐默然 永初二年季彥如京師省宗人仲淵是年夏河南四縣雨雹如棬杯大者如斗殺禽畜雉兔折樹木秋苗盡天子責躬省過

並令幽隱有道術之士各得假變事亟陳厥故季彥與仲淵說道其意狀曰此陰乘陽也貴臣擅權母后黨盛多致此異然乃漢家大忌時下邳長孫子逸止仲淵第聞是言也心善之因見上說焉上召季彥季彥見於德陽殿陳其事如與仲淵言也曰陛下增修聖德慮此二者而已夫物之相感必以類推其甚者必有山崩地震垂氣相因其事不可盡論往者延平中鄧后稱制而東垣巨屋山大崩聲動安邑即前事之驗者帝默然左右

皆不善其言季彥聞之曰吾豈容媚勢臣而欺天子乎  
後子逸相魯舉季彥孝廉固辭不就會遭兄長彥憂遂  
止乎家季彥為人謙退愛厚簡而不華終不以榮利變  
其恬然之志見不義而富貴者視之如僕隸舉筆則典  
誥成章吐言必正名務理故每所交游莫不推先以為  
楷則也年四十有九延光三年十一月丁丑卒史稱年四十七

孔叢子卷下

謹案卷中第十頁後三行寡人以民多犯法刊本  
以訛爾今改

第十四頁前八行子順聞之間魏王曰刊本聞問  
二字互訛今改

第十八頁後三行及三月政成刊本月訛年據家  
語及上文改

第二十三頁後六行王之交最為天下之上矣按  
上一本作主

第三十五頁前二行秦滅魏求耳餘刊本餘訛魚

今改

第三十五頁後二行王又聞子賢按子下疑脫魚字

第四十四頁前一行譬類枕佳按枕一本作誠

卷下第十二頁後二行徵臣蘭臺令史刊本徵訛  
微今改



總校官庶吉士臣張能照  
校對官庶吉士臣翟槐

謄錄舉人臣孫潢